

## Zapisnik sa XXVII sjednice Upravnog odbora PS FBiH

Br: 9-1/18  
Sarajevo, 11.1.2018.

### ZAPISNIK

sa **XXVII sjednice Upravnog odbora Planinarskog saveza FBiH**, održanoj u kancelariji Saveza, Mula Mustafe Bašeskije 63, dana **23.12.2017.** sa početkom u **10:10 h.**

**Prisutni članovi UO:** Zehrudin Isaković - predsjednik, Sead Ribić, Jasminka Hadžišehić, Muhamed Novalić, Ermin Lipović, Dijana Mandžo, Senada Husarić, Zoran Šimić, Enes Kajmaković, Jasenko Kapidžić i Armin Vatreš.

Sjednici su prisustovali Dragan Markelić, predsjednik Skupštine PS FBiH i Eduard Jukić, predsjednik Nadzornog odbora PS FBiH i tehnički sekretar Naida Uk.

### DNEVNI RED

- 1. Usvajanje zapisnika sa XXVI Sjednice Upravnog odbora PS FBiH**
- 2. Ostavka generalnog sekretara**
- 3. Komisija za vodiče**
- 4. Komisija za GSS**
- 5. Alpinistička obuka za policiju MUP-a Ze-Do kantona**
- 6. Projekat BH BIVAK**
- 7. Projekat Trebević – pješačka staza br. 1 – iz Sarajeva na vrh Trebevića**
- 8. Projekt „Via Ferrata Osobac“**
- 9. Gradski planinarski savez Zenice**
- 10. Učitelji planinarstva**
- 11. Odluka o cijeni članskog materijala za 2018. godinu**
- 12. Poziv za dostavljanje dokumentacije za izbornu Skupštinu**
- 13. Prijedlog izmjena u Pravilniku za vodiče**
- 14. Razno**

**Ermin Lipović** traži da se uvrsti dopuna dnevnog reda koju je dostavio putem e-maila.

**Enes Kajmaković** traži da se tačka 2. i 4. zamjene na dnevnom redu.

**Zehrudin Isaković** iznosi da nije bilo komentara na prijedlog dopune dnevnog reda Ermina Lipovića i da se ne mogu skidati tačke sa dnevnog reda koje su od životne važnosti. Kao predlagač dnevnog reda ostaje kod istog dnevnog reda.

**Ermin Lipović** iznosi da nije dobio nikakve materijale za tačku broj 6. Nema nikakvih informacija o projektu, načinu realizacije i cijeni četiri gradnje. Smatra da se morala donijeti odluka o realizaciji projekta. Napominje da je projekat „Trebavić“ realizovan, da su isplaćena sredstva i da se tek sad stavlja

## Zapisnik sa XXVII sjednice Upravnog odbora PS FBiH

na dnevni red kad je sve završeno bez znanja Upravnog odbora. Naglašava da kao član Upravnog odbora želi da bude upoznat sa svime kad već nije do sada imao informacije.

**Zehrudin Isaković** iznosi da informaciju o svim projektima, uključujući i Trebević, iznio na Skupštini PS FBiH. Stavlja na glasanje predloženi dnevni red.

**ZA – 8**

**PROTIV – 2**

**SUZDRŽANI – 1**

**Dnevni red usvojen i odbacuju se prijedlozi Ermina Lipovića.**

### **AD 1. Usvajanje zapisnika sa XXVI Sjednice Upravnog odbora PS FBiH**

**Zoran Šimić** iznosi da u tački 4. gdje se govori o XXV elektronskoj sjednici vezano za proceduru odabira izvođača radova na izgradnji skloništa pogrešno se uvodi termin "tender", a za sto ne postoji uporište u zakonskoj regulativi. Pretpostavlja da su drugi članovi UO ovaj termin koristili u kolokvijalnom smislu, ali ispravan termin je "poziv" ili preciznije "konkurentski poziv" i smatra da u zvanični zapisnik može ući samo stvarni naziv nekog tijela, organa, akta, procedure i sl.

**Ermin Lipović** napominje da su u zapisniku u AD.11 u zaključku stoji da će se računi dostaviti na narednoj sjednici i traži da se računi dostave na uvid prije glasanja.

**Zehrudin Isaković** smatra da će uvid u račune oduzeti dosta vremena i da se uvid može izvršiti nakon sjednice. Stavlja na glasanje zapisnik XXVI Sjednice Upravnog odbora PS FBiH.

**ZA – 8**

**PROTIV – 1**

**SUZDRŽANI – 2**

**Zapisnik sa XXVI sjednice UO PS FBiH usvojen većinom glasova.**

### **AD 2. Ostavka generalnog sekretara**

**Miralem Husanović** iznosi da je zvanično podnio ostavku članovima Upravnog odbora 24.11.2017. godine putem e-maila. Nakon toga je radio više od 15 dana, što potvrđuje činjenica da je pripremio i bio na 26. sjednici UO 9.12.2017. godine. Napominje da je nakon što je zamjenjena brava na vratima kancelarije bez njegovog znanja tražio da se na 26. sjednici UO uvrsti njegova ostavka pod tačkom razno. Kako se Upravni odbor oglušio na tu molbu, a što stoji i u zapisniku sa 26. sjednice UO, primoran je bio da podnese neopozivu ostavku i prekinuo komunikaciju sa predsjednikom. Naglašava da je razloge ostavke naveo pismeno i da se neće ponavljati, ali naglašava da želi da obrazloži pismo predsjednika Zehrudina Isakovića koje je uputio članovima Upravnog odbora. Izjava predsjednika da prešućuje da živi u Mostaru nije tačna jer je upravo predsjednik potpisao promjenu prijave osiguranja na obrascu JS3100. Podsjeća da je predsjednik napisao da laže kako je od njega tražio da se izvjesti UO, ali dalje u tom pismu navodi da je unatoč njegovom upozorenju neovlašteno pozvao da članovi UO pregledaju dokumentaciju. Dalje je naveo da se laže o sumnjivim putovanjima, a u izvodima se vide isplate predsjedniku za putovanje u Sloveniju. Vezano za sumnjive isplate napominje da postoje isplate za koje nema odluka Upravnog odbora, kao ni za realizaciju projekta „Trebević“. Napominje da je detaljnije pregledao izvode tek nakon što je predsjednik zabranio pokazivanje dokumentacije članovima Upravnog odbora i da je tek onda većinu stvari vidio. Iznosi da Planinarski savez posjeduje karticu sa kojom se plaća gorivo za koju nije znao i koju nikad nije koristio. Također iznosi da su ispaćivana sredstva po ugovorima njemu nepoznatim ljudima i da je predsjednik uplaćivao na svoj privatni račun određena sredstva bez odluka Upravnog odbora i smatra da o svemu treba biti upoznat UO. Iznosi da je svoju obavezu ispunio time što je o svemu obavijestio UO i da neće da odgovara za radnje za koje nije znao i u kojima nije učestvovao. Napominje da ostaje kod ostavke.

**Jasminka Hadžišehić** iznosi da je slala dopise za finansije puno prije Senade i Ermina i tražila ugovore o djelu i općenito o troškovima, a nikad nije dobila odgovor, niti je dobila odgovor da to nije dozvolio predsjednik. Napominje da je za sve što je pisala ima dokaz u svom računaru. Iznosi da se sve može provjeriti i da generalni sekretar ne spominje koliko je on dobio para po ugovoru, koliko je dobio Ermin Lipović i ostali. Postavlja pitanje zašto se ovo nije ranije spominjalo ako je bilo problema i zašto generalni sekretar nije ranije reagovao.

## Zapisnik sa XXVII sjednice Upravnog odbora PS FBiH

**Ermin Lipović** iznosi da je pregledao neke od dostavljenih izvoda, potvrđuje da je istina ono što je govorio Miralem Husanović i također smatra da ima dosta sumnjivih isplata. U nastavku navodi datume i iznose nekoliko ispata sa računa za koje tvrdi da nije upoznat Upravni odbor i da nisu donesene odluke. Smatra da su ovo radnje koje daju naslutiti da ima možda zloupotrebe položaja na koje je upozoravao predsjednika, ali i članove Upravnog odbora jer nije poduzeto ništa po tom pitanju. Protivi se ostavci generalnog sekretara jer smatra da je radio profesionalno i predlaže da se pod tačkom razno raspravlja o odgovornosti predsjednika o svemu ovome.

**Zoran Šimić** iznosi da predsjednik nije jednak član Upravnog odbora sa ostalim članovima iz jednostavnog razloga jer predsjednik odgovora za zakonitost rada i odgovara pred zakonom. Smatra da se krši statut i da je trebalo o svemu obavijestiti Nadzorni odbor, a ne Upravni odbor.

**Dragan Markelić, predsjednik Skupštine**, čita član 30. Statut PS FBiH. Sumnja da se radilo bez odluka Upravnog odbora i napominje da svaki Saveza član ima pravo da ostvari uvid u poslovne knjige i drugu dokumentaciju u vezi sa imovnom i finansijskim poslovanjem Saveza.

**Ermin Lipović** iznosi da nije samo predsjednik odgovoran nego cijeli Upravni i Nadzorni odbor. Smatra da kao član Upravnog odbora ima pravo, ali i obavezu da pregleda dokumentaciju. Poziva članove Upravnog odbora da preuzmu ovlasti koje su date po zakonu i statutu.

**Senada Husarić** iznosi da je tražila informaciju koliko Savez ima uposlenih i kolika je plata generalnog sekretara, a da nikad nije dobila tu informaciju. Hoće da preuzme svoju odgovornost i nedozvoljava da neko za nju donosi odluke. Traži da se kod glasanja ubuduće upiše kako je ko glasao. Iznosi da nikad nije vidjela ugovor koji je potpisan sa generalnim sekretarom. Navodi da nije u pitanju ostavka, nego raskid ugovora o radu. Postavlja pitanje predsjedniku kako to da generalni sekretar živi u Mostaru, a radi u Sarajevu i prima platu od 480,00 KM, topli obrok od 130,00 KM i ima za prevoz 115,00 KM. Iznosi da je protiv ostavke jer je kraj mandata. Boji se da sredstva sa računa mogu nestati i predlaže da se donese zaključak da nema više isplata do kraja mandata ili da se navede za šta se tačno mogu pare isplatiti kao operativni troškovi, dnevnice, putni troškovi, itd. Napominje da ukoliko dođe do određene istrage svi članovi UO će biti pozvani, a ne samo predsjednik.

**Zehrudin Isaković** slaže se sa Senadom da nije ostavka, nego raskid ugovora o radu. Iznosi da zahtjev jednog člana UO, a posle toga i drugih, koji su tražili pregled izvoda od 1.1.2017. godine nije statutan i da je to prekoračenje ovlaštenja člana UO, jer ne postoji član statuta u kojem se članovima UO omogućuje uvid u poslovanje, pa je tražio mišljenje Nadzornog odbora. Generalni sekretar je prekoračio svoja ovlaštenja kad je bez znanja predsjednika napisao da je svim članovima UO slobodan pristup dokumentaciji. Smatra da se ne može dokumentacija bez konsultacije sa predsjednikom dijeliti bilo kome jer to nije vlasništvo generalnog sekretara. Nakon toga generalni sekretar je prekinuo komunikaciju, ili slao odgovore sa jako velikim zakašnjenjem što se odrazilo na rad u kancelariji. Iznsi da je poslao pismo generalnom sekretaru sa molbom da uradi nekoliko stvari koje u nastavku čita:

„Pozivam generalnog sekretara:

Da hitno a najkasnije do 15.12.2017. u kancelariju Saveza dostavi tonske zapise svih sjednica Upravnog odbora kao i Skupština PS FBiH i PS BiH, kao i ostalu dokumentaciju koja pripada Savezu, što nije ispoštovao.

Da napiše Izjavu o korištenju službenog telefona. Naime, uvidom u listing poziva sa službenog telefona za predhodni mjesec, uočeno je enormno pojačana frekvencija zvanja telefonskog broja +38761144248 (vlasnik Ermin Lipović, član Upravnog odbora) čija je ukupna dužina razgovora 2:45:30. S obzirom da je ovo neuobičajno, molim da se da obrazloženje. Obrazloženje nisam dobio.

Da generalni sekretar napiše Zapisnik i prateće Odluke sa XXVI sjednice (posljednje održane), te da ga po uobičajnoj proceduri dostavi u kancelariju Saveza na usklašavanje sa predsjednikom Saveza, najkasnije do ponedjeljka 18.12.2017. godine. Generalni sekretar je Zapisnik poslao 19.12. bez usaglašavanja sa predsjednikom.

Da se u kancelariju Saveza najkasnije do 18.12.2017. dostavi potpisan Zapisnik sa Skupštine PS FBiH i PS BiH održane u Konjicu 7.10.2017. godine. Napomena: rokovi da se ova obaveza izvrši su već odavno istekli. Zapisnik je donio tek danas na sjednicu.

Podsjećam generalnog sekretara da je do konačnog raskida Ugovora o radu obavezan obavljati redovne poslove generalnog sekretara u skladu sa Ugovorom o radu, Statutom, i Zakonom o radu FBiH.“

Predsjednik Saveza napominje da je samo katanac na kancelariji promjenjen, a ne brava, jer je dobijen dopis od PD „Treskavica“ da je bilo niz provala unutar zgrade i da mole da se promjene brave. Kako sekretar nije komunicirao sa kancelarijom jasno je da nije imao tu informaciju. Bez ključa je bio pola

## Zapisnik sa XXVII sjednice Upravnog odbora PS FBiH

sata prije sastanka, tokom kojeg mu je i uručen ključ. Također je sekretar napravio niz povreda ugovora o radu, a to da je ispred KES Summit Banovići zajedno sa KES Limit Bihać organizovao lednički tečaj. Prethodne godine Savez je organizovao takav tečaj, a u planu je bio da se održi i ove godine, što je nelojalna konkurencija jer ljudi koji su trebali ići preko Saveza nisu išli nego su išli preko svojih klubova. A pored toga, u terminu održavanja tečaja, predsjednik nije dobio zahtjev za odsustvo sa posla ili traženje godišnjeg odmora. Za boravak u Mostaru navodi da je svakako znao. Generalnom sekretaru u Ugovoru o radu stoji radno mjesto Sarajevo i Banovići, gdje je tada živio, te da se komunikacija u početku dobro odvijala. Naida je preuzela poslove dežurstva u kancelariji, izdavanja markica i finansijskih poslovanja prema bankama, jer to može raditi samo onaj ko živi u Sarajevu, a generalni sekretar je permanentno izvan Sarajeva. Kako je vrijeme prolazilo taj odbos je postojao sve hladniji i bilo je sve manje komunikacije, pa je kao predsjednik morao preuzimati obaveze u kancelariji. Nakon dobijanja velikih projekata morao je odlaziti na desetine sastanaka, iako je to trebala biti obaveza generalnog sekretara. Navodi da mu je žalja i motivacija bila da se završe preuzete obaveze. Ako se ustanovi neki proceduralni propust to je bilo samo da bi se napravila određena korist Savezu. Suština je tih projekata je korist Saveza, a ne bilo koga pojedinačno, pa ni predsjednika. Zamjeri generalnom sekretaru što navodi da nije bilo odluka za određene radnje, a za pripremanje i pisanje odluka je upravo generalni sekretar zadužen. Smatra da je generalni sekretar bio dužan da za te navodne i njemu sumnjive isplate traži prvo objašnjenje od predsjednika i dobio bi objašnjenje, a ako ga to objašnjenje ne zadovolji onda bi trebao napraviti konkretna zapažanja i uputi Nadzornom odboru koji je jedini i isključivi kontrolor finansijskog poslovanja. Naglašava da nikome, pa ni generalnom sekretaru ne oduzima pravo na reakciju, ali na Statutom i pravilnicima predviđen način, što sada nije slučaj. Naglašava da zahtjev za kontrolom finansijske dokumentacije, od nekih članova Upravnog odbora, nije statutan i da je sva njegova aktivnost usmjerena prema zaštiti statut i zakonitost rada Upravnog odbora. Način na koji je generalni sekretar zloupotrijebio pristup dokumentaciji i bez znanja predsjednika Saveza, putem maila poslao izvode svim članovima Upravnog odbora je skandalozan i protustatutan. Time se namjerno proizvela konfuzija sa upitnim motivima.

**Ermin Lipović** smatra da generalni sekretar nije zloupotrijebio položaj time što je Upravnom odboru, organu koji upravlja Savezom, dostavio izvode. Postavlja pitanje kako će Upravni odbor upravljati Savezom ako nema uvid u dokumentaciju. Iznosi da se pismeno obratio tražeći na uvid dokumentaciju, a da je predsjednik odbio zahtjev bez da je to iznio Upravnom odboru i u to uvukao Nadzorni odbor bez ikakve potrebe.

**Zehrudin Isaković** traži da se Upravni odbor izjasni o ostavci generalnog sekretara i znosi da kod izbora novog sekretara treba uzeti u obzir više nije moguće da generalni sekretar bude neko ko živi izvan Sarajeva.

**Dijana Mandžo** predlaže da generalni sekretar nastavi sa radom kao što je do sada radio jer smatra da je dobro obavljao svoju dužnost. Iznosi da Upravni odbor treba da utvrdi tačnost navoda generalnog sekretara i napominje da i ona traži uvid u dokumentaciju.

**Senada Husarić** predaže da se ponudi Miralemu plaćanje stana u Sarajevu i da nastavi sa radom.

**Jasminka Hadžišehić** predlaže da Miralem nastavi sa radom kao što je do sada radio jer je kraj mandata.

**Miralem Husanović** iznosi da mu je žao što se na njegovu ostavku gleda kao da brani Ermina Lipovića i da zajedno rade protiv Saveza jer to nije istina. Smata da je obavljao ulogu generalnog sekretara time što je ukazao na to da postoje isplate bez valjanih odluka, a da se sad pokušava krivnja prebaciti na njega. Napominje da će se doći ponovo do revizije ukoliko se nastavi ignorisati ovaj problem.

**Ermin Lipović** predlaže da se donese odluka o obustavljanju svih transakcija koje nisu donesene od strane Upravnog odbora, da oduzme pravo potpisa predsjedniku bez znanja UO i da se raspišu izbori u roku od mjesec dana, a u tih mjesec dana da se zamoli Miralem da nastavi sa radom.

**Zehrudin Isaković** smatra da prijedlog Ermina Lipovića nije osnovan, nije utemeljen u statutu i bez ikakvog smisla i potrebe da se zaustavlja rad Saveza. Traži od Miralema da se izjasni hoće li nastaviti sa radom jer je to prijedlog članova Upravnog odbora.

**Miralem Husanović** iznosi da može ostati na mjestu generalnog sekretara do kraja mandata pod uslovom da se dostavi sva dokumentacija Upravnom odboru i da se Upravni odbor upozna sa cijelom dokumentacijom Saveza.

**Zehrudin Isaković** iznosi da ne pristaje na ucjene i predlaže da se prihvati ostavka i raskine ugovor sa generalnim sekretarom i raspiše konkurs za novog generalnog sekretara.

## Zapisnik sa XXVII sjednice Upravnog odbora PS FBiH

**Zoran Šimić** predlaže da se koncipira prijedlog kako će raditi generalni tajnik u skladu sa zakonom, te tačno definiše režim rada bez ikakvih uvjeta.

**Dragan Markelić, predsjednik Skupštine,** predlaže da Upravni odbor glasa o uvjetima Miralema i izjasni se jel pristaje da se sva dokumentaciju da na uvid Upravnom odboru. Napominje da će se obratiti finansijskoj policiji ako se ovo ne završi kako treba da se završi jer predsjednik ne dozvoljava uvid Upravnom odboru u dokumentaciju.

**Zehrudin Isaković** iznosi da je za njega potpuno neprihvatljivo da Upravni odbor bude ucjenjen od generalnog sekretara. Smatra da je dokumentacija Upravnom odboru dostupna kroz materijal na sjednicama Upravnog odbora, kroz redovne izvještaje, informacije i upit, ali i dalje ostaje pri stavu da je sistematsko pregledavanje bankovnih izvoda kontrola finansijskog poslovanja a za to je nadležan isključivo Nadzorni odbor. Poziva predsjednika Nadzornog odbora da se izjasni.

**Eduard Jukić, predsjednik Nadzornog odbora,** iznosi da je Nadzorni odbor koji ima tri člana na poziv da vanredno izvrši kontrolu to uradio časno i čestito. Smatra da postoji nekih tehničkih problema koji se svakome mogu desiti. Ono što je važno da je konstatirano da je novac ušao na račun i da se troši za projekte, a da nisu pregledali imaju li sve odluke jer projekti nisu gotovi i smatra da je to obaveza UO. Također napominje da se nije detaljno ulazilo u dubiozu jer će se to raditi na kraju godine, kad će se provjeriti imaju li sve odluke. Iznosi da vjerovatno fale neke odluke, ali da se to može retroaktivno donijeti. Smatra da nije primjereno da Upravni odbor i Nadzorni odbor zajedno pregleda dokumentaciju.

**Armin Vatreš** iznosi da neće sjediti satima i pregledati dokumentaciju, ali ako postoji sumnja za konkretne stvari da se te konkretne isplate provjere. Ako je to kompromis, on je za to da se pregledaju konkretni projekti i popratna dokumentacija, ali da Upravni odbor nema pravo niti on želi da sjedi ovdje i lista jedan po jedan izvod. Smatra da to treba da radi Nadzorni odbor.

**Zehrudin Isaković** predlaže da se napravi završni račun jer je kraj godine. Uz završni račun ide knjiga izvoda i Upravni odbor će imati priliku da pregleda sve izvode i dokumentaciju kroz završni račun.

**Sead Ribić** iznosi da svaki projekat mora proći proceduru i napominje da mu je žao što to predsjednik još nije shvatio. Traži da se provede procedura i donesu odluke prije kretanja u projekat. Iznosi da Upravni odbor neće kontrolisati dokumentaciju, nego traži uvid u dokumentaciju, a smatra da svaki član Saveza ima pravo na uvid u svu dokumentaciju. Predlaže da Miralem ostane na mjesetu generalnog sekretara i da se poštuju procedure.

**Zehrudin Isaković** predlaže da se napravi raskid ugovora sa generalnim sekretarom i da se raspiše oglas

**Miralem Husanović** predlaže da se omogući članovima Upravnog odbora uvid u finansijsku dokumentaciju omogući i da se zakaže sljedeća sjednica UO 13.1.2018. godine kad će se raspravljati o uvidu u dokumentaciji. Napominje da će samo pod tim uslovom ostati na mjestu generalnog sekretara.

**Zehrudin Isaković** smatra da je uslov Miralema neprihvatljiv kao i način na koji se traži kontrola dokumentacije za koju je zadužen Nadzorni odbor, a ne Upravni odbor. Smatra da je zloupotrijebio pristup podacima time što je dio izvoda dostavio članovima Upravnog odbora.

**Jasminka Hadžišehić** se slaže sa predsjednikom da generalni sekretar nije smio poslati izvode članovima Upravnog odbora i predlaže da se obaveze generalnog sekretara prebace na tehničkog sekretara Naidu Uk i u skladu s tim uveća plata do kraja mandata jer je kasno za konkurs i novi izbor.

**Senada Husarić** zahtjeva da se pokaže dokumentacija jer je poslala zahtjev prije tri mjeseca. Predlaže da se prekine sjednica ili traži smjena predsjednika zbog toga što neće da omogući uvid u dokumentaciju. Obrača se predsjedniku i iznosi da će zvati policiju ukoliko ne omogući uvid u dokumentaciju.

**Ermin Lipović** traži od članova Upravnog odbora da glasaju bez predsjednika jer je dato više prijedloga koje predsjednik ignoriše i neće da ih stavi na glasanje. Predlaže da generalni sekretar nastavi sa radom do Skupštine kao što je do sada radio i da se dostavi dokumentacija na uvid prije sjednice Upravnog odbora 13.1.2018. godine.

**Jasminka Hadžišehić:** predlaže da se sjednica održi 13.01.2018. u 11:00, a sat prije, ko je zainteresovan, da pogleda ono što ga znima od dokumentacije, te da se ne pravimo ludi, da je uvid i kontrola u dokumentaciju jedno te isto.

**Zehrudin Isaković** formuliše i stavlja na glasanje zaključak.

**ZA – 10**

**PROTIV – 0**

**SUZDRŽANI – 1**

**Zaključak usvojen sa jednim suzdržanim glasom.**

## Zapisnik sa XXVII sjednice Upravnog odbora PS FBiH

**ZAKLJUČAK:** Upravni odbor će održati narednu sjednicu 13.1.2018. godine u 11,00 sati, a u 10,00 sati će biti omogućen članovima UO uvid u svu dokumentaciju Saveza, te da ukoliko se utvrde neke proceduralne nepravilnosti donesu potrebne odluke. Ostavka generalnog sekretara se prolongira do iduće sjednice kad se bude raspravljalo o dokumentaciji Saveza, a do tada će sekretar nastaviti sa radom kako je to do sada obavljao.

14:30 Sjednicu napuštaju Muhamed Novalić i Dijana Mandžo zbog ranije preuzetih obaveza.

### **AD 3. Komisija za vodiče**

Zehrudin Isaković stavlja na glasanje izvještaj sa polaganja vodiča A kategorije u Visokom i odluku o dodjeljivanju zvanja za vodiče A kategorije.

**ZA – 9**

**PROTIV – 0**

**SUZDRŽANI – 0**

**Izvještaj i odluka usvojeni jednoglasno.**

### ODLUKA O DODJELJIVANJU ZVANJA ZA VODIČE A KATEGORIJE

Zehrudin Isaković stavlja na glasanje finansijski izvještaj sa polaganja vodiča u Visokom i odluku o isplati troškova.

**ZA – 9**

**PROTIV – 0**

**SUZDRŽANI – 0**

**Izvještaj i odluka usvojeni jednoglasno.**

### ODLUKA O ISPLATI TROŠKOVA SA POLAGANJA ZA VODIČE U VISOKOM

### **AD 4. Komisija za GSS**

Zehrudin Isaković stavlja na glasanje izvještaj sa GSS ljetnog tečaja održanog u Busovači.

**ZA – 9**

**PROTIV – 0**

**SUZDRŽANI – 0**

**Izvještaj usvojen jednoglasno.**

Zehrudin Isaković stavlja na glasanje finansijski izvještaj sa GSS ljetnog tečaja održanog u Busovači i odluku o isplati troškova.

**ZA – 9**

**PROTIV – 0**

**SUZDRŽANI – 0**

**Izvještaj i odluka usvojeni jednoglasno.**

### ODLUKA O ISPLATI TROŠKOVA SA GSS TEČAJ U BUSOVAČI

### **AD 5. Alpinistička obuka za policiju MUP-a Ze-Do kantona**

Zehrudin Isaković podsjeća da smo na prošloj sjednici donijeli Odluku o realizaciji obuke specijalne jedinice MUP-a Ze-Do kantona. U međuvremenu je obavio sastanak sa komadantom te jedinice, koji ga je informisao da se obuka mora izvršiti u 2017. kalendarskoj godini, jer su predviđena sredstva za plaćanje obuke iz tekuće godine, te da bi ukoliko se obuka prolongira ta sredstva propala, a obuku ne bi bilo moguće izvršiti. Predsjednik iznosi da je poslao službeni mail generalnom sekretarom da se hitno poduzmu aktivnosti po ovom pitanju. Pismeni odgovor od generalnog sekretara dobio je tek nakon 8 dana u kojem se konstatira da ljetnu obuku nije moguće izvršiti jer je sada zima, te da se u ovome još konstatovao sa neimenovanim instruktorom. S obzirom na ograničenost u terminima, bio je prisiljen

## Zapisnik sa XXVII sjednice Upravnog odbora PS FBiH

hitno reagirati te organizirati obuku. Razgovarao je sa instruktorom alpinizma Jurom Miljkom koji je preuzeo dalje aktivnosti na obuci zajedno sa asistentom Edinom Drinom koji su iz Zenice, pa njihov angažman ne predstavlja dodatne troškove.

**Ermin Lipović** traži da se poništi odluka donešena na prošloj sjednici kad su izabrani instruktori i asistenti za navedenu obuku. Napominje da je ponovo prekršena procedura.

**Miralem Husnaović** iznosi da je u razgovoru sa drugim instruktorom došao do zaključka da zbog vremenskim uslova ljetna škola alpinizma ne može održati u decembru. Smatra da davanje diploma po svaku cijenu nije dobra praksa jer obuku nije bilo moguće ozbiljno realizovati u zimskim uslovima.

**Zoran Šimić:** iznosi da ljudi ne traže ni značku, ni zvanje nego samo obuku.

**Enes Kajmaković:** iznosi da će oni dobiti samo diplomu, te za obuku nije potrebno formiranje ispitne komisije.

**Zehrudin Isaković** daje na glasanje stavljanje van snage odluku o angažovanju instruktora alpinizma za MUP ZDK od 9.12.2017. i prijedlog da se angažuje instruktor alpinizma Jure Miljak i asistent Edin Drino za alpinističku obuku za MUP ZDK.

**ZA – 8**

**PROTIV – 0**

**SUZDRŽANI – 1**

**Odluka usvojena većinom glasova**

### ODLUKA O ANGAŽOVANJU INSTRUKTORA JURE MILJKA I ASISTENTA EDINA DRINE ZA OBUKU ZA MUP ZDK

#### **AD 6. Projekat BH BIVAK**

**Zehrudin Isaković** iznosi da je jako malo vremena ostalo za realizaciju projekta i izgradnju futurističkog bivka na Velikoj kapi i još 3 bivka na Čvrsnici i Prenju. Napominje da je projekat ocjenjen od prioritetne važnosti za razvoj planinarskog turizma u FBiH i da su lokacije za izgradnju bivaka uvjetovane samim projektom. Traži od Upravnog odbora da se donese odluka za početak realizacije projekta i da se donesu odluke o izboru lokacija za izgradnju bivaka koje su u prilogu.

**Senada Husarić** iznosi da je prije dva mjeseca tražila projekat na osnovu kojeg se apliciralo prema ministarstvu. Napominje da se mora imati projekat za svaki objekat ili bar tehničko rješenje i urbanističku saglasnost ili saglasnost lokalne zajednice za svaku lokaciju na kojoj će se graditi objekti. Iznosi da postoje dva projekta, jedan od 20.000,00 KM i drugi od 100.000,00 KM. U prvom projektu za 20.000,00 KM Savez je dužen izgraditi 3 bivka, a u drugom projektu od 100.000,00 KM Savez je dužen izgraditi 4 bivka. Napominje da se time Savez obavezao za izgradnju 7 bivaka za 120.000,00 KM. Podsjeća da je u projektu navedeno da će futuristički bivak iznositi 35.000,00 KM, a da je donesena odluka za izgradnju tog bivka za 70.000,00 KM i postavlja pitanje od kojih para će se uzeti razlika.

**Ermin Lipović** iznosi da je prva informacija za bh-bivak bila u maju 2017. godine kad je prezentiran futuristički bivak. Podsjeća da su napravljene dvije elektronske sjednice, jedna za imenovanje komisije za evaluaciju ponuda i druga o izboru najpovoljnije ponude. Postavlja pitanje koliko tačno treba bivaka izgraditi i zašto Upravni odbor nije odlučivao o lokacijama bivaka i na osnovu čijeg poziva su dostavljene ponude za futuristički bivak jer Upravni odbor nije bio upoznat sa pozivom.

**Jasminka Hadžišehić** traži da se svi uozbilje i da se ne blokira gradnja bivaka. Iznosi da ministarstvo neće odobriti projekat bez valjane dokumentacije i da je ponosna što će Savez graditi bivke. Naglašava da je predsjednik na Skupštini ispričao o bivcima i projektu Trebević, a sada se neki prave da nisu upoznati ni sa čim.

**Zehrudin Isaković** iznosi da na računu Saveza ima 120.000,00 KM za izgradnju 4 bivaka i da se u ministarstvu ta dva projekta gledaju kao jedan projekat. Predsjednik upozorava na rokove i da se nema vremena odlagati realizacija projekata jer bi to moglo imati negativne posljedice. U nastavku čita cijeli ugovor sa ministarstvom. Konstatuje da iscrpljena diskusija i stavlja na glasanje paket odluka o realizaciji bivaka.

**ZA – 7**

**PROTIV – 2**

**SUZDRŽANI – 0**

**Odluke usvojene većinom glasova.**

## Zapisnik sa XXVII sjednice Upravnog odbora PS FBiH

ODLUKA O REALIZACIJI PROJEKTA BH BIVAK  
ODLUKA O IZGRADNJI BIVKA NA BARNOM DOLU (PRENJ)  
ODLUKA O IZGRADNJI BIVKA NA SOPOT SEDLU (PRENJ)  
ODLUKA O IZGRADNJI BIVKA NA SLJEMENU (ČVRSNICA)

**Ermin Lipović** traži da se u zapisnik unese da je protiv donošenja odluka jer nije imao potpunu i validnu dokumentaciju vezanu za projekte.

**Senada Husarić** traži da se u zapisnik unese da je protiv iz razloga pokrenute nabavke radova u vrijednosti od 70.000,00 KM za bivak koji će minirati kompletan program. Ako bi se ponovo pokrenuo postupak i ispoštovala valjana procedura napominje da bi podržala projekat.

### **AD 7. Projekat Trebević – pješačka staza br. 1 – iz Sarajeva na vrh Trebevića**

**Zehrudin Isaković** informiše da je od Grada Sarajeva Savez dobio 10.000,00 KM. Iscrpno informiše o projektu i opisuje kako je do njega došlo. Projekat je pokrenut na inicijativu gradskih vlasti koji su željeli da Planinarski savez zajedno sa PD „Trebević“ Sarajevo, uradi planinarsku stazu iz centra grada Sarajeva na vrh Trebevića, kao brendiranu gradsku stazu koja će biti u zvaničnim turističkim ponudama. Nakon uvodnih razgovora napravljen je projekat i gradska vlada je odobrila sredstva. Izvedba projekta bila je požurivana od strane Gradskih vlasti, jer su je planirali otvoriti u oktobru ili novembru. Samu realizaciju projekta permanentno je pratio zamjenik gradonačelnika koji je u više navrata boravio na samoj stazi i vrhu Trebevića. Ova saradnja rezultirala je dobro urađenim projektom i pismom zahvale od strane zamjenika gradonačelnika. Realizacijom ovog projekta Planinarski savez se pozicionirao kao ozbiljan i relevantan partner te otvorio put za nastavkom uspješne saradnje sa gradskim vlastima.

**Ermin Lipović** napominje da Upravni odbor nije imao valjane informacije vezane za projekat na vrijeme i da je sad već realizovan projekat. Upravni odbor se dovodi pred svršen čin i naglašava da neće o ovome glasati jer nije imao nikakve informacije.

**Jasminka Hadžišehić** kaže da u svojoj planinarskoj karijeri nikada nije znala šta se dešava u Savezu, kad je neko dobio pare i slično, sve do sada. Neke stvari se ne mogu stići. Čak je na skupštini sve rečeno o projektima.

**Zoran Šimić** govori se da je gradska uprava Grada Sarajeva odredila da se uradi projekat. Ja vas pitam bi li bili sretniji da je to neka druga organizacija uradila!? Čini se da je bitnija forma nego suština.

**Senada Husarić** iznosi da se odluke ne mogu donijeti na ovoj sjednici jer nisu na dnevnom redu i da se krši poslovnik. Traži da se donošenje odluka prenese na sljedeću sjednicu.

**Armin Vatreš:** iznosi da kada se raspravljalo o drugoj tački, ostavka generalnog sekretara, da su se svi složili za kompromis da se donesu sve potrebne odluke. Pita da li je motiv da se odluke odlažu i da se ponovo raspravlja o istim.

**Zehrudin Isaković** stavlja na glasanje izvještaj i odluku o isplati 5.000,00 KM za PSD Trebević i odluku o realizaciji projekta Trebević.

**ZA – 7**

**PROTIV – 1 (Senada Husarić)**

**SUZDRŽANI – 1 (Ermin Lipović)**

**Izvještaj i odluke usvojeni većinom glasova.**

ODLUKA O ISPLATI PSD TREBEVIĆ 5.000,00 KM  
ODLUKA O REALIZACIJI PROJEKTA PJEŠAČKA STAZA BR. 1 NA TREBEVIĆ

**Ermin Lipović** traži da se u zapisnik unese da je suzdržan zato što nema valjane dokumentacije i što nemamo retroaktivno donošenje odluke o realizaciji sredstava.

### **AD 8. Projekt „Via Ferrata Osobac“**

**Zehrudin Isaković** informiše da je za projekat „Via Ferrata Osobac“ potrebno donijeti odluku o isplati za projekt menadžera i odluka o nabavci ferrata kompleta koje su predviđene projektom.

**Ermin Lipović** traži da se definiše šta uključuje iznos za projekt menadžera od 3.000,00 KM.



## Zapisnik sa XXVII sjednice Upravnog odbora PS FBiH

**Jasminka Hadžišehić** smatra da su putni nalozi koji se odnose na ovaj projekat u sklopu od 3.000 KM pa da se u konačnoj isplati ta sredstva odbiju.

**Zoran Šimić** predlaže formulaciju odluke o isplati 3.000,00 KM sa uključenim putnim troškovima u bruto iznosu.

**Senada Husarić** iznosi da sredstva za projekt menadžera nisu odobrena od ministarstva i da će Savez iz svojih sredstava morati isplatiti projekt menadžera, a to nema planirano u budžetu. Smatra da projekt menadžera treba posljednjeg treba isplatiti, nakon svih ostalih koji su radili na projektu.

**Zehrudin Isaković** Stavlja na glasanje odluku o isplati 3.000,00 KM u bruto iznosu sa putnim troškovima i Odluku o nabavci ferrata kompleta.

**ZA – 7**

**PROTIV – 1**

**SUZDRŽANI – 1**

**Odluke usvojena većinom glasova.**

### ODLUKA O ISPLATI 3.000,00 KM ZA PROJEKT MENADŽERA (ZEHRUDIN ISAKOVIĆ) ODLUKA O NABAVCI FERRATA KOMPLETA

**Ermin Lipović** traži da se u zapisnik unese da je suzdržan zato što nije imao sve odgovore na vrijeme i zato što nije imao validne informacije.

#### **AD 9. Gradski planinarski savez Zenice**

**Zehrudin Isaković** informiše da je stigla molba za pomoć koja je dostavljena u materijalima. Iznosi da Savez ima dovoljno novca na računu da može izdvojiti oko 500,00 KM.

**Zoran Šimić:** Ja sam za prilog od 500,00 KM, poznavao sam čovjeka i zaslužio je.

**Ermin Lipović** iznosi da se pored sredstava koje će Savez izdvojiti on se odriče putnih troškova od sjednice u iznosu od 50,00 KM i moli da se uplati zajedno sa iznosom Saveza.

**Zehrudin Isaković** stavlja na glasanje prijedlog o isplati 500,00 KM za pomoć PD Željezara Zenica za podizanje spomenika planinaru Miroslavu Mitroviću Čarliju i konstatuje da se Ermin Lipović odrekao putnih troškova u iznosu od 50,00 KM koje će se uplatiti zajedno sa sredstvima Saveza.

**ZA – 9**

**PROTIV – 0**

**SUZDRŽANI – 0**

**Odluka jednoglasno usvojena.**

### ODLUKA O ISPLATI 550,00 KM PD ŽELJEZARA ZA POMOĆ

#### **AD 10. Učitelji planinarstva**

**Zehrudin Isaković** stavlja na glasanje odluku za licenciranje Admira Ibričića za učitelja planinarstva.

**ZA – 9**

**PROTIV – 0**

**SUZDRŽANI – 0**

**Odluka jednoglasno usvojena.**

### ODLUKA O LICENCIRANJU ADMIRA IBRIČIĆA ZA UČITELJA PLANINARSTVA

#### **AD 11. Odluka o cijeni članskog materijala za 2018. godinu**

**Zehrudin Isaković** stavlja na glasanje da članarina za 2018. godinu ostane ista kao ranije godine i to seniorske markice 12 KM i juniorske 7 KM.

**ZA – 9**

**PROTIV – 0**

**SUZDRŽANI – 0**

**Odluka jednoglasno usvojena.**

### ODLUKA O CIJENI ČLANSKOG MATERIJALA ZA 2018. GODINU

## Zapisnik sa XXVII sjednice Upravnog odbora PS FBiH

### **AD 12. Poziv za dostavljanje dokumentacije za izbornu Skupštinu**

**Zehrudin Isaković** iznosi da je dostavljen prijedlog za izbornu Skupštinu koji je sastavio prethodni Upravni odbor. Stavljajući na glasadnje prijedlog da se zadužuje generalni sekretar da 25.12.2017. dostavi prijedlog poziva i obrazaca članovima Upravnog odbora za prijedloge i sugestije, a da se nakon toga 29.12.2017. godine objavi poziv i dostavi svim članicama Saveza. Rok za podnošenje prijave je od 1.1.2018. do 31.1.2018. godine.

**ZA – 9**

**PROTIV – 0**

**SUZDRŽANI – 0**

**Odluka jednoglasno usvojena.**

### ODLUKA O DOSTAVLJANJU POZIVA ZA IZBORNU SKUPŠTINU

### **AD 13. Prijedlog izmjena u Pravilniku za vodiče**

**Zoran Šimić** obrazlaže prijedlog za izmjenu pravilnika za vodiče koji je dostavljen u materijalima.

**Senada Husarić** se sjeća da je Upravni odbor član po član pravilnika iščistili ali da nije prečišćeni tekst stavljen na stranicu nego je pravilnik u prijedlog stavljen na stranicu. Traži da se to ispravi i slaže se sa prijedlogom Zorana Šimića.

**Zaključak:** Generalni sekretar se zadužuje da pregleda detaljno prijedlog za izmjenu pravilnika iz jula 2016. godine i uvrsti navedene izmjene ukoliko su usvojene.

### **AD 14. Razno**

**AD 14.1. Dragan Markelić**, predsjednik Skupštine, traži ispred predsjednika Komisije za orijentaciju da se pošalje dopis BMU da se takmičenje u orijentacije odgođi za 2019. godinu, a da Makedonija bude domaćin 2018. godine.

**ZA – 8**

**PROTIV – 0**

**SUZDRŽANI – 0**

**Prijedlog jednoglasno usvojen.**

**AD 14.2. Zehrudin Isaković** informiše da je uspješno realiziran pohod na 4 olimpijske planine.

Sjednica završena u 17:20